

Morning Regional Dogri News Bulletin, 04th July 2024

मार्निंग डोगरी न्यूज़ बुलेटिन, समें. 09-20 Hrs



Headlines

1. प्रधानमंत्री नरेन्द्र मोदी होरें आखेआ जे जम्मू कश्मीर च आतंकवाद खलाफ लड़ाई अपने खीरले चरण च ऐ।
2. पुलस महानिदेशक आर.आर.स्वैन होरें आखेआ जे जम्मू कश्मीर च सुरक्षा स्थिति पूरी चाल्ली नियंत्रण च ऐ।
3. टी-20 विश्व कप जित्तने मगरा दिल्ली पुज्जने पर भारती क्रिकेट टीम दा जोरदार सुआगत कीता गेआ।
4. श्री अमरनाथ जी दी यात्रा दे पैहले 5एं दिनें दरान इक लक्ख थमां बद्ध श्रद्धालुएं पवित्र गुफा च मत्था टेकेआ। जम्मू दे भगवती नगर आले आधार शिविर थमां 5 ज्हार 696 श्रद्धालुएं दा इक होर जत्था घाटी लेई रवाना।
5. मौसम विभाग नै जम्मू कश्मीर च अज्जै कोला 3 दिनें भारी बरखा दी चेतावनी जारी कीती ऐ।



PM-Kashmir

प्रधानमंत्री नरेन्द्र मोदी होरें आखेआ ऐ जे जम्मू कश्मीर च आतंकवाद खलाफ लड़ाई हुन अपने खीरी गेड़ च ऐ ते आतंकी ढांचे दा समूलचा नाश करने आली बहुमुखी नीति अपनाई जा करदी ऐ। राष्ट्रपति हुंदे संसद दे दौनें सदनें गी दित्ते गेदे अभिभषण पर धन्नबाद प्रस्ताह दा परता दिंदे होई कल राज्यसभा च प्रधानमंत्री होरें आखेआ जे पिछले 10एं बरें च जम्मू कश्मीर च आतंकवाद सरबंधी घटनाएं च बड़ी मती कमी आई ऐ। उनें आखेआ इनें लोकसभा चुनाएं च भारी गिनतरी च होए दे मतदान कन्नै एह साबत होई गेआ ऐ जे लोकें दा भारती लोकतंत्र च बड़ा गैहरा विश्वास ऐ।



Army Chief

सेनाध्यक्ष जनरल उपेन्द्र द्विवेदी होरें कल जम्मू कश्मीर च नियंत्रण रेखा पर सुरक्षा हालात ते कारवाइएं सरबंधी तैआरिएं दा जायजा लैता। 30 जून गी भारतीय फौज दे सरबराह दा औहदा सांभने दे बाद कल बडलै ओह जम्मू पुज्जे ते बन्ने कन्ने लगदे पुंछ जिले लेई रवाना होई गे। इस दरान उत्तरी कमान दे जीओसी लैफ्टिनेंट जनरल सुचिन्द्र कुमार ते व्हाइट नाइट कोर दे जीओसीलैफ्टिनेंट जनरल नवीन सचदेवा बी मजूद हे। सेना प्रमुख होई इनें अधिकारिएं सनें पुंछ च फील्ड कमांडरें कन्नै बैठक लाई ते मगरा अगेत्रे इलाकें दा हवाई सर्वेक्षण बी कीता। जनरल द्विवेदी होर 2022 कोला लेइयै 2024 तगर जम्मू कश्मीर च उत्तरी कमान दे अध्यक्ष दे तौरा पर अपनियां सेवां देई चुके दे न। उंदा एह दौरा जारी अमरनाथें दी यात्रा ते जम्मू प्रांतै दे बक्ख-बक्ख जिलें च जारी आतंकवाद रोधी कारवाइएं दी पछोकड़ै च लाया गेआ ऐ।

<><><><><><>

J&K DGP(byte)

पुलस महानिदेशक आर.आर.स्वैन होरें आखेआ ऐ जे कनून नाफस करने आलिएं अजेसी ते सुरक्षा बलें दा सुरक्षा हालात पर पूरा नियंत्रण ऐ। उनें आखेआ जे अज्जै कोला त्रै-चार ब'रे पैहले कनून बवस्था गी लेइयै जेहड़ी शैंका ते डर-त्राह बने दा रौहदा हा, ओहदे च बड़ा मता सुधार आई चुके दा ऐ ते एह हाल च होए दे लोकसभा चुनाएं च लोकें दी शमूलियत ते उत्साह दिक्खियै साफ समझेआ जाइ सकदा ऐ। डीजीपी होरें कल जम्मू च पत्रकारें गी संबोधत करदे होई आखेआ जे किश कदें कतालें निक्की मुट्टी घटनाएं गी छोड़ियै कनून बवस्था समूलचे जम्मू कश्मीर च पूरी चाल्ली काबू च ऐ।

<><><><><><>

PM-Congress

प्रधानमंत्री नरेन्द्र मोदी होरें आखेआ ऐ जे 2024 ब'रे दे आम चुनाएं लोकें दी सोच ते फैसला साफ दस्सी दित्ता जे उनें प्रोपगेंडे गी नेई, कारकरदगी गी वोट दित्ता ऐ। कल संसद च राष्ट्रपति हुंदे अभिभाषण पर धन्नबाद प्रस्ताह दा परता दिंदे होई उनें आखेआ जे साढ़ा संविधान नियम-धाराएं दा शड़ा इक सकलन गै नेई सगुआं एहदी इक इक गल्ल इक शब्द, इक इक भावना बी अपने आपै च बड़ी महत्वपूर्ण ऐ। उनें आखेआ जे पिछले 6 दहाकें च एह पैहली बार ऐ जे 10एं ब'रें तोड़ी सत्ता च रौहने दे बाद बी कुसै सरकार गी लोकें परतियै देश दी सेवा करने लेई अपना आदेश दित्ता ऐ। उनें आखेआ जे बीजेपी दी अगुवाई आली एनडीए सरकार भारत गी इक विकसित ते आत्मनिर्भर राष्ट्र बनाने लेई दूर संकल्प ऐ। उनें आखेआ जे लोकें दा मत भारत गी दुनिया दी त्रीह सब्बने शा बड़्डी अर्थबवस्था बनाने लेई ऐ जेहड़ी इसलै दुनिया च 5में नंबर पर ऐ। उनें कांग्रेस दी उस टिप्पणी पर बी नशाना लाया जेहदे च उन्नै आखेआ हा जे सरकार कुसै दी बी होए, देश विकास करादा रौहदा ऐ।



Rahul-BJP

लोकसभा च विपक्ष दे नेता राहुल गांधी होरें दोष लाया ऐ जे बीजेपी हिंदू धर्म दी बुनियादी भावना गी नेई समझदी ऐ। कल अहमदाबाद च अपने पार्टी दफतर च हुकमरान पार्टी दी नुख्ताचीनी करदे होई राहुल गांधी होरें एह गल्ल आकखी। अपनी इक सोशल मीडिया पोस्ट पर राहुल होरें लिखेआ जे बंड पोआने आलियं नीतिएं लेई जनता बीजेपी गी जरूर सबक सखाग।



Cricket Team

टी-20 क्रिकेट विश्व कप विजेता भारतीय टीम अज्ज बडलै बारबाडोस थमां दिल्ली हवाई अड्डे पर पुज्जी गई ऐ। दिल्ली दे अंतर्राष्ट्रीय हवाई अड्डे पर भारतीय क्रिकेट टीम दे बड़ी बद्ध गिनतरी च प्रशंसक मजूद हे जिनें बड़े जोरें-शोरें उंदा सुआगत कीता। भारतीय टीम बारबाडोस च होए दे महा मकाबले दे मगरा बेटिल तूफान च फसने दी वजह कन्नै वापस पुज्जने च चिर लग्गा। भारतीय टीम दा मुंबई लेई रवाना होने थमां पैहले प्रधानमंत्री नरेन्द्र मोदी हुंदे आवास पर उंदे कन्नै मलाटी करोग।



Amarnath Yatra

इस बरे आली श्री अमरनाथ जी दी यात्रा दे पैहले 5एं दिनें च इक लक्ख थमां ब0 श्रद्धालुएं पवित्र गुफा च मत्था टेकेआ ऐ ते शिवें दे हिमलिंग रूपै दे दर्शन कीते न। दक्खनी कश्मीर च स्थित श्री अमरनाथ जी श्राईन च कल 30 ज्हार 586 श्रद्धालुएं मत्था टेकेआ। यात्रा शुरू होने थमां लेइयै कल्लै तगर इक लक्ख 5 ज्हार 282 श्रद्धालुएं पवित्र गुफा च बर्फू नै बने दे शिलिंग दे दर्शन कीते। केन्द्र शासत प्रदेश दी सरकार आस्सेआ यात्रा लेई लोडचदे इंतजाम कीते गे न। यात्रिएं दी सुरक्षा लेई पुख्ता बंदोबस्त कीते गे न। अज्ज जम्मू दे भगवती नगर आले आधार शिविर थमां 5 ज्हार 696 श्रद्धालुएं दा जत्था 219 गड्डिएं दे काफले च सुआर होई घाटी लेई रवाना होआ। इंदे च इक ज्हार 591 मर्द, 360 महिला, 5 बच्चे, 64 साधु ते 8 साधवियां बालटाल लेई रवाना होए ते 2 ज्हार 896 मर्द, 651 महिला, 5 बच्चे, 103 साधु ते 13 साधवियां पहलगाम आले रस्ते राएं अपनी यात्रा करगंन।



Ramban Yatra

श्री अमरनाथ यात्रा पर औने आले श्रद्धालुएं गी बेहतर सुविधा उपलब्ध करोआने दे मकसद कन्नै रामबन प्रशासन आस्सेआ चन्द्रकोट स्थित अमरनाथ यात्री निवास च श्रद्धालुएं लेई व्यापक प्रबंध कीते गेदे न। इत्थें 15 इमारतां न ते हर इमारत दियां त्रै मंजलां न ते 74 कमरे न। हर रोज पैहला जत्था बडलै 6 बजे चन्द्रकोट पुज्जदा ऐ ते उत्थुं यात्रु पहलगाम ते बालटाल लेई खाना होई जंदे न।

<><><><><><>

MVD Kishtwar

मनुक्खी अधिकारें सरबंधी राष्ट्रीय आयोग दे दिशा निर्देश दे परामर्श पर कारवाई करदे होई श्रम ते रोजगार मैहकमे नै मोटर गडिडए दे विभाग कन्नै रलियै ई-श्रम पोर्टल पर पंजीकरण करने लेई इक जागरूकता शिविर लाया ऐ। इस दरान किश्तवाड़ ते डोडा जिले दे ट्रक डरैवरें, सहायकें ते नेह होरने लोकें ई-श्रम पोर्टल पर पंजीकरण करने लेई जानकार बनाया गेआ। एहदा मकसद इनें लोकें दा इस पोर्टल पर पंजीकरण करना ते उनेंगी समाजी सुरक्षा जियां बीमा ते पेंशन स्कीम दे लाह उपलब्ध करोआना ऐ। इस दरान श्रम मैहकमे आस्सेआ मौके पर गै पंजीकरण करने लेई काउंटर बी लाया गेदा हां

<><><><><><>

JJM-Udhampur

उधमपुर दियां डिप्टी कमीशनर सलोनी राय होरें जिले च जल शक्ति मिशन तैहत प्रगति दा जायजा लैता। बैठक दरान डिप्टी कमीशनर होरें स्कीम दी अमलावरी दरान आवा'रदी रुकावटें गी दूर करने पर बल दित्ता। उनें कम्म करा'रदे कंटेरेक्टरें गी आखेआ जे ओह एईई कन्नै नेडमा तालमेल बनाइयै कम्म करन। उनें कम्म गी तौले मुकम्मल करने आसतै रफतार गी बधाने पर जोर दित्ता। बकाया पेदी स्कीमें गी शुरू करने लेई बी गलाया। उनें कम्म करा'रदे लोकें गी कम्म गी समें सिर पूरा करने लेई बी गलाया।

<><><><><><>

MET

मौसम विभाग दे दफतर आस्सेआ अज्ज यानि 4 जुलाई कोला लेइयै 6 जुलाई तोड़ी त्रै दिन जम्मू कश्मीर केन्द्र शासत प्रदेश च दरमयाने कोला भारी बरखा अलर्ट जारी कीता गेदा ऐ। इक सोशल मीडिया पोस्ट च मौसम विभाग दे श्रीनगर केन्द्र आस्सेआ संवेदनशील इलाकें च चानचक्क हाड़ औने, ल्हास पस्सियां जां पहाड़ें परा कुप्पड़ पौने दी बी शैका जताई दी ऐ। एहदे इलावा पदरे-झिगड़े इलाके च बरखा कारण पानी किट्ठा होई सकदा ऐ। पिछले किश दिनें दरान तापमान च कमी जरूर आई ऐ पर ब्हाऊ च बधदी नमी कारण गुम्मे कारण

लोकें गी परेशानी पेश आवा करदी ऐ। जम्मू च कल दिने दा बद्धोबद्ध तापमान 36.6 डिग्री सैल्सियस ते ब्हाऊ च नमी दी मात्रा 71 फीसद दर्ज कीती गई।

